



Tunabarikiwa Tunapofundisha

Wengine

Anyweshaye atanyweshwa mwenyewe.—**Mithali 11:25.**

Mafundisho ya Kristo yalikuwa udhihirisho wa kusadiki na uzoefu, na wale wanaojifunza Kwake wanakuwa walimu kwa kufuata mfano wa Mungu. Neno la Mungu, likisemwa na mtu ambaye ametakaswa kwalo, huwa na uwezo wa kuleta uzima, na huingia katika roho za watu. Mtu akilipokea neno kwa upendo, atalidhihirisha hilo katika mwenendo wake na sauti yake. Ataeneza kile ambacho yeye mwenyewe amesikia, ameona na kugusa kuhusu neno la uzima, ili kwamba wengine wapate kuwa na ushirika pamoja naye kwa kumjua Kristo. Ushuhuda Wake, kutoka kwenye midomo iliyoguswa na kaa la moto kutoka madhabahuni, ni ukweli kutoka katika moyo ulio tayari kupokea, na hufanya kazi ya kutakasa tabia.

Na yeye anayetafuta kusambaza nuru kwa wengine, yeye mwenyewe atabarikiwa. "Yatakuwako manyunyu ya baraka." "Anyweshaye, atanyweshwa mwenyewe." Mungu anaweza kutimiza kusudi Lake la kuwaokoa wenye dhambi bila msaada wetu; lakini ili tuweze kukuza tabia kama ya Kristo, tunapaswa tushiriki katika kazi Yake. Ili kusudi tuingie katika furaha ya utukufu wa Kristo—furaha ya kuona waliookoka kwa damu Yake—inatulazimu tushirikiane Naye katika kazi Yake kwa ajili ya wokovu wao.

Ungamo la imani la Nathanaeli lilikuwa katika masikio ya Yesu sawa na wimbo mtamu. Na akajibu na kumwambia, "Kwa sababu nilikuambia kuwa, nilikuona chini ya mti, Unaamini? Utaona mambo makuu kuliko haya." Mwokozi alitazamia kwa furaha kazi yake ya kuhubiri habari njema za wokovu, akiwaganga waliovunjika, na kuwatangazia wafungwa kufunguliwa kwao kutoka kwa Shetani. Kwa kufikiri juu ya baraka za thamani alizowaletea wanadamu, Yesu akaongeza tena, "Amin, amin nakuambia, tangu sasa utaona mbingu zikifunguka, malaika wa Mungu wakipanda na kushuka juu ya Mwana wa Adamu."

Hapa Kristo alikuwa akisema kuwa, kando ya Yordani mbingu zilifunguka, Roho akashuka juu yangu kama hua. Tukio hilo lilikuwa ni ishara kwamba mimi ni Mwana wa Mungu. Lakini ukaniamiini, imani yako itaimarishwa. Utaona kuwa mbingu zimefunguka, wala hazitafungwa. Nimezifungua kwa ajili yako. Malaika wa Mungu wanashuka wakichukua maombi ya wahitaji na wenye dhiki kwa Baba, na kushuka kuleta tumaini, na shime, na uzima kwa wanadamu.

Malaika wa Mungu daima wanapita kutoka duniani kwenda mbinguni, na kutoka mbinguni kwenda duniani.... Kwa njia hiyo Kristo ni njia ya mawasiliano kati ya wanadamu na Mungu, na Mungu na wanadamu (Tumaini la Vizazi Vyote, sehemu ya 1, uk. 120–121).